

## Tüpfhäng

Woa aols Bou oft maa Ahnl bsouchn.  
Niat waale bröva woa.  
Na,- naa,zwäng ihran Gsudheitskouchn  
binne sua oft doa.  
Doch sie haoutse imma gfreiz  
wenne aogruckt bi:  
"Du kummstme bsouchn? dös is gscheit,  
sezte naa glei hi!"  
Gsudheitskouchn haouts aftrong.  
Ich höbme niat gschenieat  
ud ho vullagschtopft mein Mong.  
Dhwaal sie dischkarieat.  
Sie waa hoalt a sua gaonz aolloi.  
Wos denn ich amaoi wia tou?  
Ud,- wose dhrüwba moi,  
ob sie schou boal schtärmb mou?  
Ich ho geschült oda knappt,  
sie haout boal glacht,boal grinna  
ud üwba meina Haawa gschaabt:  
"Graouß weads öizt änks Kinna!  
Mei,wenne sua aon fröiha dänk!"  
Sie nimtme ba die Häand:  
"Du ärbst amaoi döi Tüpfhäng,  
dös is maa Testament."  
Maa Ahnl döi woa rüchte shtolz  
af ihra Tüpfhäng.  
Woa a aas ächtn Aichnhoolz  
ud a Haouchzatsgschänk.  
Porzllinana Tüpfle sean draoghängt.  
Blämla woan draafgmaolt.  
Zoubundn woans. Ich howbma dänkt,  
daaß hoalt ko Schtaab aifallt.  
Döi soallte aolso amaoi ärb.  
Ich ho hoalt dhzou knappt,  
dänk: "Wos tout miet suran Schärmb  
a Bou denn üwbahaapt?"  
Maa Ahnl woare schpaata oft nu bsouchn,  
echaal woas aas gleich.

Bringt Kaffee miet Gsudheitskouchn.

Redt va ihra Leich.

Greint, läiätse a bißl saa,  
zaigt af Tüpfhäng-  
ud saogt döi ghäiat amaol maa,  
daaße aon sie dänk.

Wöi naouchat is maa Ahnl gschtormb,  
howbe rüchte plärret.

Öizt binne aiascht inna woan  
wos sura Ahnl wärt.

Ud Tüpfhäng? döi haout aon Oart  
drinn in meina Schtumb.

Ich schtäih oft voa ihra dort  
wenne hoima kumm.

Aas Bröifl nimme naou in dh Häand,  
va mein Ahnl gschriemb:

"Dösdaou is maa Testament  
aon mei Hintabliemb."

Döi poa Wörtla song vüll, weas dhfoaht:

"Bou, du ~~weast~~ sua ost maa Traoust.

Ud döi Tüpfle howbe vullagschpoat,  
daaßts amaol laichta haoust."